



Inatsisartuni ilaasortaq
Tillie Martinussen, Suleqatigiissitsisut
/Maani

Ikuallaaviit eqqagassalerinerlu pillugit § 37 naapertorlugu apeqquteqaammut nr. 301-2019-imut akissut

Brevdato: 19-09-2019
Sagsnr.: 2019-19583
Akt-id: 11567807

Asasara Tillie Martinussen

Postboks 1614
3900 Nuuk
Tlf. (+299) 34 50 00
Fax (+299) 34 54 10
E-mail: pan@nanoq.gl
www.naalakkersuisut.gl

6. september 2019-imi ikuallaaviit eqqagassalerinerlu pillugit Naalakkersuisunut
apeqquteqaateqarputit. Apeqquteqaatit uannit akisassanngorlugit
innersuunneqarput.

1. Naalakkersuisut naatsorsuutiginerlugu eqqakkanut ikuallaavimmik Uummannami pilersitsinissartik?

**1a. Taamaassimappat taava ikuallaaviup aallartinnissaata
qularnaarnissaanut suliaq sumut killippa?**

1b. Taamaassimangippat, suna pissutaava?

Akissut: Uummannami najugaqarfinniluunniit allani eqqakkanik ikuallaavinnut
minnerusunut aningaasaliinissaq Naalakkersuisunit pilersaarutigineqanngilaq.
Peqqissuseq avatangiisillu eqqarsaatigalugit ikuallaavinnik minnernik atuinerup
qimanneqarnissaa pisariaqarluinnalerpoq, ikuallaaviit minnerit pujoq
naammattumik salissinnaanngimmassuk. Tamatuma peqatigisaanik ullumikkut
eqqakkagut maanna ikuallaaviusut ikuallassinnaasaannit 30%-it missaannik
amerlanerupput.

Taamaattumik Naalakkersuisut borgmesterillu tamarmiusut
isumaqatigiissutigaat, peqqissuseq avatangiisillu eqqarsaatigalugit nuna
tamakkerlugu ikuallaavinnik angisuunik marlunnik, nuna tamakkerlugu
eqqakkanut nuna tamakkerlugu ikuallaavissanut assartorneqartussanut
naammattunik toqqorsivilinnik sanasoqassasoq. Nuna tamakkerlugu ikuallaaviit
nutaat najukkani ikuallaavinnut minnernut atorneqartunut taartaassapput.
Avatangiisinut peqqissutsimullu iluaqutaassapput, kiisalu nunatsinni
avatangiisinut mingutsitsinngitsumik nukissiornermut tapertaassallutik. Nuna
tamakkerlugu ikuallaaviit Sisimiuni Nuummilu sananeqassapput, taakkulu
saniatigut Qaqortumi, Maniitsumi Aasiannilu uuliakunut ikuallaavinnik
sanasoqassaaq.

Naalakkersuisut 10. juli 2019-imi Avatangiisinut Aningaasaateqarfik
aqqutigalugu Uummannami eqqaavissuup immikkut ittumik salinneqarnissaanut
Avannaata Kommunanut 400.000 koruuninik aningaasaliissuteqarput. Tassalu
Avannaata Kommunia kommunita ataatsimoorlutik eqqagassanik
ingerlatseqatigiiffianit ESANI A/S-imit tapiiffigineqarluni Uummannami

saviminikunik eqqaavissuarmilu eqqakkanik suliareqqitassanik assartuussinissamik pilersaaruteqarpoq. Suliassaq 2019-imi septembarip ingerlanerani aallatinneqassaaq. Tamatuma saniatigut Naalakkersuisut 2019-imi maajimi Avatangiisinut Aningaasaateqarfik aqputigalugu Uummannami eqqaavissuarmut ungalunut matorsuarmullu tapiissuteqarput. Naalakkersuisut tapiissuteqarnissaannut Avannaata Kommuniata aningaasaleeqataanissaa piumasarineqarpoq, eqqagassalinerneq kommunip akisussaaffigimmagu.

2. Naalakkersuisut naatsorsuutiginerlugu illoqarfinni nunaqarfinnilu ikuallaaveqanngitsuni kommunit ikuallaavilersuilerpata tapersorsorumaarlugit?

2a. Taamaassimappat Naalakkersuisut sunik pilersaaruteqarpat kommunit ikiornissaannut eqqarsaatigalugit eqqakkat ikuallaavinni akuerisani ikuallanneqartalernissaat?

Akissut: Apeqqut 1-imut akissut takuuk.

Naalakkersuisut nuna tamakkerlugu eqqagassalinerinermi aaqqiissutissatut ikuallaavinnik annerusunik marlunnik sananissamut kommuninut aamma kommunit ataatsimoorlutik eqqagassanik ingerlatseqatigiiffiannut ESANI A/S-imut tapiissuteqarnissartik naatsorsuutigaat. ESANI A/S ikuallaavissanik nutaanik pilersaarusiornissamut Avatangiisinut Aningaasaateqarfimmiit 6 mio. koruuninik tapiiffigineqarnissamik neriorsorneqarpoq. Ukiuni tulliuuttuni nuna tamakkerlugu eqqagassanut aaqqiissutissanik pilersaarutigineqartunik pilersitsisarnissamut ukiumut minnerpaamik 10 mio. koruunit Avatangiisinut Aningaasaateqarfimmi immikkoortinneqartarnissaat naatsorsuutigineqarpoq.

3. Naalakkersuisut uppersarsinnaanerlugu Avannaata Kommuniata eqqagalerinermut pilersaarutaa ilumut malinneqartoq?

3a. Taamaassimangippat, suna pissutaava?

3b. Taamaassimangippat Naalakkersuisut unioqqutitsilluni iliusereriikkanut iliuseqarnissaminut periarfissaqarpat imaluunniit Naalakkersuisut periarfissaqarpat kommunit ikiussallugit qularnaarniarlugu nuna tamakkerlugu peqqinnissakkut illersorneqarsinnaasumik eqqagalerisoqalernissaa?

Akissut: Naalakkersuisut maannarpiaq Avannaata Kommuniani eqqagassanut pilersaarut malinneqarnerneq ataatsimoortumik naliliiffigisimangilaat. Pineqaatissiinnissamut periarfissat igitassanik eqqaasarneq pillugu Namminersornerullutik Oqartussat nalunaarutaanni nr. 28-mi, 17. september 1993-imeersumi kapitali 8-mi takuneqarsinnaapput. Aammattaaq apeqqut 1-imut aamma 2-mut akissutit takukkit.

4. Uummannami imeq qanoq akulikitsigigumik nalilerneqartarpa, imaluunniit illoqarfinni allani avinngarusimasumik ikuallaaveqartunik, uani eqqarsaatigeneqarpoq eqqakkanik ikuallaanerup kinguneranik erngup pitsaassusaasa partikilinit nakkaasunit sunnerneqartarsimasinnaanera?

Akissut: Imeq imigassaq inatsisit tunngavigalugit akuttoqatigiinnik misissuisarnikkut nakkutigineqarpoq, taakkunanilu imeq kemiimullu tunngasut

misissorneqartarput aammalu tappiorannartoqassutsimik misissuisoqartarluni. Misissuisarnerup akulikissusissaa erngup imigassap pitsaassusia aamma imermik pilersuiviit nakkutigineqarnerat pillugit Namminersornerullutik Oqartussat nalunaarutaanni nr. 7-imi, 17. marts 2008-imeersumik aalajangersarneqarpoq. Misissueqqissaarnerit tamarmik GEUS-imi Jupiter databasemi takuneqarsinnaapput.

Misissuisarnerit akulikissusiinut erngup ullup unnuallu ingerlanerini pilersuutigineqartup annertussusia apequtaasarpoq.

5. Uummannami najugaqarfiit silaannaap pujormik toqunartortalimmik peqarsinnaanera paasiniallugu uuttortaasoqartarnerluni imaluunniit illoqarfinni allani avinngarusimasumik ikuallaaveqartuni, taakkunani ikuallaasoqarsimatillugu peqqinnissakkut ulorianartoqarsinnaanera nalilersorneqartarnerluni?

Akissut: Naagga, Uummannami najugaqarfinni silaannarmik uuttuisoqarsimangilaq. Nunatsinni sumiiffinni arlalinni ikuallaavinniit aniatitanik uuttuisoqartarsimavoq. Uttuisarneri takutinneqarpoq, ikuallaaviit maanna atorneqartut pujoq naammattumik salissinnaanngikkaat, taamaattumillu ikuallaaviit mikisut atorunnaarnissaat pisariaqarpoq, taakkunungalu taarsiullugu nuna tamakkerlugu ikuallaavinnik annerusunik marlunnik, putsumik naapertuuttumik saliisinnaasunik sanasoqartariaqarluni. Aamma apeqqut 9-mut akissut innersuussutigineqarpoq.

6. Naalackersuisut silaannarmi toqunartoq Dioxin pillungu ilisimasaqarnertik qanoq iliuseqarfigniarpaat - aamma allat silaannarmi toqunartut aatsitassallu arrortikkuminaatsut, eqqarsaatigalugit Uummannami illoqarfinnillu allani maaniinnaq ikuallaaviusartuni inuit peqqinnissaat naliginnaasumik eqqarsaatigalugu?

6a. Naalackersuisut isumaqarpat tamanna mingutsitsinerusok akuersaarneqarsinnaanngitsoq?

Akissut: Naalackersuisut isumaqarput, nuna tamakkerlugu ikuallaavinnik marlunnik sananissaq nukinginnarsisoq. Ikuallaavissani EU-mi ilaatigut dioxininut saffiugassanullu oqimaatsunut aniatitanut killissarititit najoqqutarineqassapput.

7. Naalackersuisut eqqarsaatiginerlugu kommunit eqqagalerineranni ikiussallugit, aningaasalersuinikkut allatigulluunnii?

Akissut: Aap, Naalackersuisut nuna tamakkerlugu eqqakkanut aaqqiissutissat naammassineqarnissaannut kommuninut ikiuunnissartik eqqarsaatigaat. Tassalu ukiuni tulluittuni nuna tamakkerlugu eqqakkanut aaqqiissutissanik pilersitsinissamut Avatangiisinut Aningaasaateqarfik aqputigalugu ukiumut minnerpaamik 10 mio. koruunit immikkoortinneqartarnissaat naatsorsuutigineqarpoq.

**8. Pilersaarutigineqarpa ikuallaaviliortoqarnissaa Uummannami aamma Kalaallit Nunaata sinnerani ikuallaaveqanngitsuni?
8a. Taamaassimappat qaqugu tamanna pissava?**

Akissut: Apeqqut 1-imut akissut takuuk.

**9. Naalakkersuisut paasisimasaqarfiginerlugu illoqarfimmi taama inuttussuseqartumi (1.200-niik 1.400-nut inulimmi) eqqakkanik ikuallaaneq avatangiisinut qanoq ajortumik kinguneqartarnersoq?
9a. Misissuisoqarnikuunerluni Naalakkersuisut innersuussutigisinnaasaannik?**

Akissut: Apeqqut 5-imut akissut takuuk.

**10. Naalakkersuisut qinnuigineqarput nassuiaqqullugu, nunami maani inatsisit naapertorlugit suut avatangiisinut illersuutit malinneqartussaataitarnersut pineqartillugu eqqagalerineq,
10 a. nassuiaqquneqarpoq Naalakkersuisut isumaqarnerisut inatsit pineqartoq nunatsinni tamarmi malinneqartoq?**


Akissut: Kommunit eqqagassalerisullu allat avatangiisit innarlitsaaliorneqarnissaanik Inatsisartut inatsisaanni nr. 9-mi, 22. november 2011-meersumi, igitassanik eqqaasarneq pillugu Namminersornerullutik Oqartussat nalunaarutaanni nr. 28-mi, 17. september 1993-imeersumi, oliakunit akuutissanillu eqqagassat pillugit Namminersornerullutik Oqartussat nalunaarutaanni nr. 29-mi, 17. september 1993-imeersumi aamma Namminersornerullutik Oqartussat nalunaarutaanni nr. 11-mi, 20. august 2004-meersumi Suliffeqarfiit mingutsitsivallaartut il.il. avatangiisinut tunngatillugu akuersissuteqarfigineqartarnerat pillugu-mi maleruagassat malittussaavaat.

Nunatsinni sumiiffinni arlalinni kommunit eqqagasalerini unammilligassat annertunerat Naalakkersuisunit eqqumaffigineqarput. Taamaattumik kommunit suleqatigalugit nuna tamakkerlugu eqqagassanut aaqqiissutissanik pilersitsinissaq sulissutigineqarpoq.

11. Suliamut tunngasunik allanik soqutiginaatilinnik Naalakkersuisut paasissutissiisinnaanerlutik?

Akissut: Naalakkersuisut eqqagassalerinermut pilersaarusiassaata kingusinnerpaamik 2019-imi oktobarimi tamanut ammasumik tusarniaassutigineqarnissaa naatsorsuutigineqarpoq. Tassani Naalakkersuisut eqqagassalerinermut pilersaarutaat pillugit annertunerusumik atuagaqartoqarsinnaassaaq.

Inussiarnersumik inuulluaqqusillunga



Kim Kielsen